



2015-imiit 2018 ilanngullugu kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Nammi-nersorlutik Oqartussat Kommuneqarfiillu isumaqatigiissusiornissaat isumageqqullugu kiisalu isumaqatigiissummi kommunit ivigaasanik qal-likanik arsaattarfiit ingerlanneqarnerannut aserfallatsaaliorneqarnerannullu akisussaaffiup naammassinissaanut isumaqatigiissusiornis-saq isumageqqullugu Naalakkersuisut peqquneqarnissaannik Inatsisartut aalajangiiffisassaattut siunnersuut.

(Inatsisartunut ilaasortaq Anders Olsen, Siumut)
(Siullermeernera)

Demokraatit sinnerlugit Inatsisartuni ilaasortaasimasup Niels Thomsenip 2011-mi sorsuutigaa ivigaasanik qallikkanik arsaattarfiliortoqassasoq kommunini sisamani tamani. Ajoraluartumilli siunnersuut pivisunngortinneqanngilaq.

Taava maannakkut Inatsisartunut ilaasortap Anders Olsenip isumassarsiaq nangippaa. Qutsavigissavarput – kommuninimi sisamani tamani ivigaasanik qallikkanik arsaattarfiliornissaq isumassarsiatsialaavoq – sualummik isikkamik arsartartunut aammali inuttaasut peqqinnissaat eqqarsaatigalugu.

Ilisimatuut misissuinerpassuisa uppernarsererpaat, timigissarneq pinaveersaartitsisartoq aamma uummallunnermut, puannut, niuni taqqanik milittoornernut, gigtipalaamut kiisalu isumattattanermut iluaqutaasartoq. Tamatuma saniatigut aamma puigussanngilarput timigissarneq aamma pualavallaalertarneq pillugu ajornartorsiutigilersimasatsinnut illersuutaalluarmat.

Taamaattumik pingaartorujussuuvoq isumagissallugu innuttaasut timigissarnissaminnut periarfissaqarluarnissaat. Timersuut uangut kalaallit nuannarilluakkatta ilaat tassaavoq isikkamik arsarneq. Ullut tamarluinnaasa takusarpagut arsaattartut klubbip illersukkamik tujuuluaraanik atortut, aamma facebookimi takujuarpagut arsartartoqatigiinnut illersukkaminnut illersuilluartut, aamma ukiut tamaasa Kalaallit Nunaanni isikkamik arsarnermi pissartanngorniunnerni arsartut isiginnaartarpagut, aqqusinerni takujuarpagut aamma atuarfiit anitsiartarfiinni, meeqqat aliikkutarilluarlugu isikkamik arsartut.

Nunatsinni silap pissusaa pissutaalluni arsaattarfiit ivikkanik qallikkat takussaangillat, qujanartumilli teknikkikkut ineriartorerup kinguneranik ivigaasanik arsaattarfinnut qalliissutissanik peqalernikuuvoq, ivigavittut pitsaatigingajattunik.



Soorunami akikittusinnaangilaq ivigaasanik qallikkanik arsaattarfiliorneq aserfallattaaliinerlu. Taamaattumik misissorneqartariaqarpoq, arsaattarfiit ivigaasanik qallikkat qanoq akilersorneqarsinnaanersut. Aajuku isumassarsiat ilaat:

- Naalakkersuisut oqaloqatigisariaqarpaat GBU, DBU, UEFA aamma FIFA anguniarlugu sulianut aningaasanik tapiiffigineqarnissaq.

- Misissorneqartariaqarpoq periarfissaqarneq aningaasaateqarfiit ilaannakoortumik tamakkiisumilluunniit akileeqataasinnaanersut.

- Europami tamarmi arsaattarfiit aqqi niuertunut aningaasaliisartunut tunineqartarput. Assersuutigalugu Arsenalip arsaattarfia Emirates Stadiumimik ateqarpoq aamma Bayern Müncehnip arsaattarfia atserneqarnikuvoq Allianz Arena. Takorloorluarneqarsinnaavoq kalaallit nunaanni sulliviit imminnut pilerisaarutigisinnaanerat isikkamik arsaattarfik atorlugu. Aningaasat tassangaanniit isertinneqartut aserfallattaaliinermut atorluarneqarsinnaapput.

Taamatut oqaaseqarluta siunnersuut ilalerparput innersuullugulu Ilinniartitaanermut, Iisimatusarnermut, Kulturimut Ilageeqarnermullu Ataatsimiititalilamut ingerlateqqinneqassasoq.